

Dörfligeischer 1983

Judihui mir Dörfligeischer jubiliere,
Füüfedrissig Johr dür d' Beize defiliere,
Die Wirtshuus-Prozessione hei mir nid gebore,
Dä Türgg macht d' Heilsarmee jo scho sit 100 Johre !

Syt der Schüürma bi der SRG tüet wüete,
Müesse d' Glotzer und d' Loser gäng meh blüete,
Me cha halt d' Priise doch chli liechter überwache,
We me sorgt, dass si e Gump i d' Höchi mache !

Wo si bim Rosius für d' Polizeigarage loche,
Sy 'ne auti Muure grad i d' Ouge gstoche,
Do meint en Archäolog nach langem recherchiere,
Do hett mi tüüri scho der Cäsar wöue parkiere !

Der Pfarrer vo Lyss, der Streit vo Längnou, der Schriiber vo Worbe,
Dräie Chrämpf mit Gäld, me seit si syg verdorbe,
Der Pfarrer isch der allerschnäuscht gsy vo alle,
Schiesst d' Kollekte uf, u steckt i Sack, was abe isch gfalle !

Mit fahre mit Takt, genau nach Fahrplan, s'isch bewiese,
Nur stecke mir nid wie d' SBB so i're Krise,
Ou müesse mir nid Tag und Nacht viu Weiche steue,
Mir müesse nur der richtig Värs zum Bild verzeue !

Üses Strofrächt wird nach Furgler's Wunsch gäng stränger,
D' Gsetzesschlinge ume Hals wird immer änger,
U wes so wytergeit, mir chönnte's nid verchrafte,
Wei si üs - wüu mir maskiert sy - grad verhafte !

Mir finde's schad, dass üse Chrützplatz e so flach isch,
Mir hei das Gfüehl, das's mit däm Platz e so 'ne Sach isch,
Wär's e Hang mit Schnee, ihr Lüt es isch zum lache,
Chönntsich um d' Amplestange Rieseslalom mache !

E gwaltige Chlapf - em Wäutu sy Lade isch fasch e Ruine,
D' Versicherig zahlt's, jetzt macht der Mässerli gueti Miene,
Nur hei mir Geischer Angscht, es chönnti der Fernseh verjage,
Syt si däm sy Gring am Bildschirm z' zeige wage !

Der EHC isch wieder zwäg, s'isch nid zum gloube,
Allne Gägner gö si wieder Punkt um Punkt go roube,
Si näh nid öppe Doping, das chöit dir vergässe,
Doch vorem Match tuet jede drü Ragusa ässe !

Aha, aha, so-so, la-la, pip-pip, ha-ha-ha,
Lo mi ine, lo mi use, ga-ga-ga-ga,
Das isch nid öppe-n-es Ching, wo so tuet rede bla-bla-bla,
Die nöii dütschi Wälle isch dank jetze da-da-da !